

光緒三十三年五月

539.1
101

朝城縣鄉土志輯稿

朝城縣鄉土志

歷史

本境名朝城始於唐開元十年漢置東武陽秦漢以前是何地名不見史傳降至後世名之或沿或革為郡為縣與夫統隸何州代各不同謹詳列之

唐虞屬兗州地

夏屬兗州

商屬王畿地

周初為衛地

春秋齊魯衛界地

戰國為魏地

秦屬東郡

漢置東武陽屬東郡兗州部新莽易名武昌
曹魏屬陽平郡

晉置陽平郡屬司州部

南宋置陽平郡屬兗州部

北魏置陽平郡後為武陽郡復屬司州部

後齊郡廢



後周復置屬魏郡

隋屬莘州後屬魏州大業初州廢置武陽郡屬兗州

部

唐貞觀十七年省入臨黃莘縣永昌元年復置武聖

縣開元十年改為朝城元和中屬澶州後屬魏州

天祐三年改武陽尋復為朝城屬魏州河北道

五代時為朝城

宋屬開德府統於河東東路

金屬大名府大名路

元屬濮州統於山東東西道東昌路總管府

明屬東昌府濮州統於山東布政司

國朝因之雍正十三年改屬曹州府

朝城縣鄉土志

政績錄

漢

臧洪字子容廣陵射陽人靈帝時為東郡太守治武陽初為張超功曹洪說超舉兵誅董卓與諸牧守會於酸棗設壇為盟將盟無敢先登者洪乃登壇慷慨言曰賊臣卓禍加至尊今會義兵共赴國難有渝此盟俾墮其命聞者激揚袁紹表為東郡太守時曹操圍張超於雍邱洪聞之將赴其難自慮寡弱從紹請兵紹不聽未

幾雍邱陷洪怒絕不與通紹興兵圍之歷年不下使洪邑人陳琳以書示洪洪答書讓之紹知洪無降意增兵急攻城陷被執紹會諸將見洪謂曰今日服未公據地瞋目曰惜洪力劣不能推及為天下報讐何為服乎答書詳三國志祀名宦陳容臧洪同邑人隨洪為東郡丞城未陷時洪使歸袁紹及洪被執時容在座責紹殺洪紹慚怒復殺容事見三國志祀名宦

隋

張允濟青州北海人為武陽令教化大行道不拾遺有人夜

發遺袍行十餘里始寤人語之曰可還取之果得袍又元武民有以特牛依婦家者孳拾餘犢而不還訟縣不能決乃詣允濟允濟令左右縛民蒙其首過婦家云捕盜牛者令盡出牛質所從來婦家不知遽曰此婿家牛遂斷牛還婿

宋

田諒青州人慶厯壬午以著作郎知縣事時值兵興大河以北賦調紛急諒乃盡心撫字邑無流亡

明

郭黼洛陽人監生洪武初知縣事徙建縣治尤多惠政百姓安之

徐有德陝西靜甯人監生正德五年為朝城縣丞體貌魁梧有大畧時河南盜起所至殘破有德大修守具令近城民庶悉移城中清野以待寇數至攻城不下退無所得及大兵至縱兵擊之殺獲幾盡

楊昱福建人舉人嘉靖十三年知縣事愛民勤政每遇疑獄輒予輕比利弊所在慮壅於聞乃作一甌鎖閉封識止留一孔置於衙前令士民密書以納月一開焉視其所陳利害而興革之左希顏江西星子人嘉靖二十一年知縣事為政嚴明深諳民情初馬政淆亂吏胥因緣為奸希顏嚴定規則俾勞逸

皆均牧人稱便郡司嘉其能下其法於各屬又兩稅徵科書吏舞弊輕重不等希顏為平準之法弊端悉絕

楊天民山西太平人進士萬歷十八年知縣事下車問民疾苦興利除害出民湯火前案之壅滯者一一斷結置社倉平賦役均出納有古循吏風公餘進諸生講說經義旁及百家士習因之丕變後擢吏科給事中朝民為立去思碑

祀名宦

彭宗孟浙江鹽海人進士萬歷三十年知縣事嘗曰小民樂生關之縣令也因約已裕民去額外之賦罷不急之工時有

督濬河之役多方區處夫餉不煩民間初驛站多侵漁費不貲宗孟痛革之小民控訴不用差役即令其人自行傳案民免需索清廉之節始終如一民為建生祠祀名宦鄭人懌北直沙河人舉人崇禎十四年知縣事渠賊馮培蘭等劫奪鄉里人懌以計擒之人稱快焉後遭土寇城破殉難

趙應昌山西太平人歲貢崇禎十六年知縣事夙抱膽畧手擒大寇宋玉等及闖賊偽檄招降不屈而去

我朝崇尚吏治慎選守令康雍嘉道號稱盛世官本境者必多政績卓著之賢員惜縣志失修故老皆盡無從稽考其可得而述者僅在近時馬邱晉直隸寶坻人副貢順治十七年知縣事聽訟明允欽恤為心有告隱地畝者得實但令起科餘無所問政簡刑清吏胥斂手在任九載始終如一以憂去民為立去思碑

劉大紳里籍不詳乾隆間任以廉惠稱有劉青天之日朝之漕米舊多浮收大紳至時值開徵乃親詣水次使民自量自概積弊以去聽訟一問輒結鄉民感德每大紳初度父老爭攜瓜果躋堂介祝去官之後人思之曰安得使君如劉青天者乎

胡聯奎山西交城人進士咸豐六年知縣事時盜風日熾四境被搶者層見迭出聯奎到任聯保伍選捕壯懸重賞盜遂斂踪聽訟明決日坐堂皇奸民不敢輕試每逢水旱偏災下鄉勘驗必躬必親性極嚴正請託不行當時有閩羅邑老之目

董涵字子美漢軍旗人副貢咸豐十年知縣事愛

民如子善政林立十一年春莘冠等縣教匪大起三月十六日匪首張玉懷率衆攻城城故不完旋即失陷涵督役巷戰力竭自刎賊斷其首懸之西門屍身委棄城外范令夜遣壯士昇身至范以棺盛殮首亦為鄉民孟某竊去用盆掩埋其年八月涵弟自范起柩路經朝城孟某以埋首告啟盆而視面仍如生觀者驚異遂開棺合殮焉扶柩北上之夕士民哭送十餘里初涵聞賊警幕友王某謂城難守勸涵遁免涵正色而言曰城亾與亾吾之分也何遁為

權汝欽江蘇銅山人同治二年知縣事邑舊有飛沙數百頃春夏遇風青苗被壓顆粒不獲仍完糧賦有其地者甚以為病汝欽履畝勘實稟請 奏免朝人至今感戴

姚觀炯直隸青城人舉人光緒四年四月署縣事自春迄後五月猶復亢旱不雨野無青草城東南黠民聚衆向富戶索糧名曰均糧觀炯曰此亂機也漸不可長捕得為首者立置之法然黠民仍有思亂之心在安住寺糾集夥黨數百觀炯聞之寅夜帶兵

往勦出其不意至皆駭散論者謂非觀峒勇敢則亂成矣旋以憂去至今人猶追思不置

陳佐平安徽宿遷人舉人光緒五年權朝城事斷獄如神案無留牘濬河渠興學校邑人至今誦之

黃葆年江蘇泰州人進士光緒十七年署朝城下車以來愛民訓士孜孜不倦朝地污下每逢秋潦漳河水溢西北村莊受害甚鉅葆年派夫濬深舊渠道之俾東北入運自是朝無水患十八年歲歉葆年稟請賑濟窮黎賴以全活城垣久圯不足資保障葆年籌成巨款

修築一新四圍徧植楊柳今已二十餘年樹皆合抱邑人目為甘棠之遺

朝城縣鄉土志

耆舊錄

漢

謝弼字輔宣靈帝建寧二年以對策除郎中時青蛇見前殿大風拔木弼上封事痛陳災變後去官家居中常侍曹節從子紹為東郡太守弼以罪死獄中初平二年司隸校尉趙謙訟弼始收斬紹祀鄉賢

後魏

路恃慶有幹才相州刺史表薦之太和中除奉朝請恃慶以從兄文舉才望因推讓之高祖遂並拜焉祀鄉賢

隋

田真與弟慶廣同居諸婦欲分異家有紫荆樹一株甚茂兄弟議破分為三一夕樹枯真驚謂弟曰木本同株是人不如樹也兄弟感而更合諸婦聞之亦無間言明日紫荆復榮

宋

譚廷美周世宗鎮壇淵募置帳下從征淮南以勞授控鶴軍副指揮使宋太宗即位王端冠朗州廷美率兵赴

之敗其衆擒端以還擢鐵騎指揮使領睦州刺史

明

楚樟警敏過人淹該經史洪武間以明經舉任本縣訓導儀矩嚴飭士人多所觀法後徵為詹事府丞著有四書說約

王禮歷官御史幼喪父事母曲盡其孝食必具酒肉必待母饌然後適口母病禮侍湯藥必先嘗及母卒哀毀逾禮水漿不入口者數日晝夜悲號不絕廬墓三年事聞旌表詔復其徭

魏元字景善天順元年進士授禮科給事中時萬貴妃兄弟驕橫元疏劾之慈懿太后崩議欲別葬元率同官亢章極諫竟得如禮其年九月慧星見又率諸給事上言痛陳時弊皆見明史累遷都給事中出為福建右叅政巡視海道嚴禁越海私販巨商以重金賂元怒叱之母卒哀毀廬墓三年祀鄉賢

謝綬字朝舉成化進士初令任邱興利除弊民大悅三載擢留臺御史守備蔣琮恣肆綬以不法劾之下吏出按山西都督李翊剝削士卒公列其罪羣吏震懾復按兩浙

歲飢民多流徙方造進用羅綺費巨萬綬奏罷之武宗
即位逆瑾擅權招通賄賂綬無所曾且與抗禮瑾銜之
瑾誅召為大理寺卿多所平反以都御史巡撫山西簡稽
軍實默逐貪暴威聲遠震以勞瘁卒於官祀鄉賢

江東字伯陽嘉靖乙丑進士為山西巡撫獲火金巨萬入告
濟邊擢兵部左侍郎陞工部尚書倭亂江南廷推東文
武才改兵部尚書奉詔討平因陳防海八事戊午山西右
衛被圍世宗選主客兵七萬以東往援圍遂解捷聞加東
太子太保通州告急世宗震驚聞東勤王至喜曰朕無憂
矣詔督六鎮援兵京師解嚴上偉東勛召見面勞賜匾
曰攸奠邦本卒謚恭襄祀鄉賢

李繼宗嘉靖辛丑進士授刑部主事歷官陝西按察司
僉事區處窮餉調度戰守悉合機宜疆宇賴之兵民為
立生祠初繼宗未達時有王誼者惠之登第後誼子貧甚
繼宗為置田三百畝報之祀鄉賢

吳中傳號巽菴萬厯甲戌進士任西安府推官斷獄明允升
戶部主事管理通州倉一切刁需之弊釐革殆盡督蘇州
兵儲羨金千餘悉報部參政楚藩旋轉陝西按察使按

部辨明冤枉勸善懲惡調雲南廉憲振綱肅紀問民俗
祛吏弊奸豪慄慄有神明之稱巡撫首薦於朝未及大用
而卒祀鄉賢

陳贊化字金鉉性孝友登天啟壬戌科進士筮仕太湖多異
政調桐城值魏璫籍都憲左光斗家時璫熖方盛羣僚獻
媚贊化獨毅然為左調護懷宗即位欽取入京授刑科給
事中秉道疾邪風節益峻周延儒為相方膺寵眷招權
納賄贊化上疏劾之疏載明史由是直聲動中外歷官左副
都御史以勞瘁嘔血假歸調養卒於途祀鄉賢

史蘭邑庠生性至孝居父喪廬於墓側日惟白糜一餐
以土輿築墳日課五輿朝夕伏墓哀號久之瘠毀骨立猶
鹽豉不入口見者無不感慟年餘疾作而卒

張坦性至孝父炳有痼疾坦侍湯藥日不離側三十年無怠
志當道屢以孝行旌壬午閩閩有回祿之災獨坦室不焚
僉謂孝感所致以歲貢任滑縣教諭

吳同芳庠生性傳之子性至孝父獲痰疾芳捧湯藥滌溺器
刷穢席厯數年不倦及病危芳焚香禱祝願以身代父病
遂愈咸以為至誠所感大府表其里為孝子里歲給穀三石

岳爾高邑廩生慷慨有氣節崇禎十六年賊攻城城陷與長男中瑾俱殉難妻孟氏聞變嘆曰夫亡矣將安歸遂偕家婦呂氏及三女皆投井死

徐宗正父早逝事母至孝以歲貢授高邱縣主簿修河有功陞西平府丞以母老還鄉終養適境內遭蝗食稼殆盡獨宗正禾無損人謂孝感所致祀鄉賢

邵璋嘉靖庚子舉人周歲喪母及髻謁墓痛哭倒地事繼母如所生父八十病痢甚璋卧床下一夕數十起手捧溺器洗滌穢汗盛夏弗輟嘗矢苦喜曰父無恙也尋愈後五年卒提學匾其門曰純孝里

江世茂恭襄之孫時值歲饑散所積粟數千石以濟餓者人皆感之世茂自謂義分當然無德色

王以遜邑庠生父增生九德病痿母羅氏病瘡以遜偕妻馬氏親侍湯藥洗拭膿血晝夜無倦色及親卒哀毀柴立分居讓產於弟有薛邑之風按臺以入孝出弟匾其門

國朝

孟兆熊順治辛卯舉人性孝友生平多大節士林則之深於麟經著有春秋題說

吳汝昌字汝亭嘉慶丁卯舉人性恢豁好施予歷
署陝西韓城南鄭等縣補郿縣知縣洊升甯羗州所
至有惠政應得廉俸悉以濟人邑之鰥寡孤獨無所
歸者莫不優恤之故人皆呼曰吳青天卒於任所廿餘
年後子峽山以事過甯邸旅知為汝昌子概不取值
馬克印居家孝友數世同居家素封好施予以致家中
落聞於太守遍其門曰孝友任恤

賈泰臨字德昌邑增生性孝友有志節家貧樂道研
究經史採取經義著四書句解

梁萬書城北妹塚人幼孤貧種菜為生力勤守約中
年致富仗義疎財凡貧苦親鄰有求必應每至年
終度其左右村人有不能度歲者不待來求酌量
往遺至老不變遠近有梁善人之目

夏仁辰夏莊人性孝謹父早故事母四十餘年母
敢少違同治元年群寇犯境仁辰負母逃避母猝
邁疾醫藥罔效呼天乞以身代母疾尋愈

李耀彩全莊人家赤貧無衣食業事母極孝母遇疾
甘旨無從得剪髮易食物委曲承歡遠近稱為孝子

孔廣松武生居城西孔家莊性慷慨好施予排難解紛為鄉里所推道光二十七年盜賊入境志力拒守縣境以安聞鄰村被劫親率團丁急追奪回車輛牛馬俱還失主嘗與賊戰身中鉛丸者四氣愈奮邑令壯之上其事於府太守李天錫贈以匾額鄉里榮之

王步衢邑庠生同治五年教匪張躋堂率賊數千人攻舍利寺步衢率隊守圩圩陷祖母與父被圍急往救護曰請速殺我無傷二老人遂皆遇害

閔克順武生舍利寺圩破克順率眾接戰見父被戕奮不顧身闖入賊隊手刃十餘人力竭被執比死罵不絕口馬岐山邑庠生居城北仁四里之張魯集成豐十一年三月十七日教匪陷城岐山聯合鄉眾築圩禦賊後賊攻圩竭力固守圩得保全莘縣延營從正為各賊首領築堡自衛十月間大帥勝保督兵來勦岐山請為前鋒傾其巢穴殺獲無算臬司丁寶楨知岐山勇敢檄召隨營勦賊屢立戰伐以功保府經歷分發江蘇

郭紹泰字靜齋城西郭爐人光緒乙酉科藍翎侍衛初官粵西梧州營中軍都司繼調署興甯營忠義

奮發每誦伏波馬革裹尸之言以自勵兩勦會匪皆一鼓
盪平以功升遊擊署粵東清遠營遊擊公出暴卒鄉
人聞之皆為扼腕紹泰少孤事母曲盡色養以賴胞叔
癸元成立事之如父友愛羣從尤逾尋常又以胞叔癸
元食指繁多分產倍予之親鄰貧者亦蒙恩施

附節烈婦女

明

郭氏熊璋妻年二十餘夫亡遺孤僅二歲氏堅意撫恤
貞白自矢卒後有芝生於柩上素光掩映異香滿室

邑令親詣審視請於臺省優恤建坊迄今子孫繁衍
為邑望族

廩生岳鎮女適孟澤洙甫四月澤洙亡氏撫屍哀號誓
不欲生家人日夜守護氏痛哭不已數月後卒以身殉
遠近聞之皆嘆息泣下

國朝

孫氏鄭山根妻家赤貧祖姑老而瞽恃姑縫紉為養
氏至代其勞勤苦備至逾歲夫亡氏二十歲矢志靡他
父某以氏年少無恒產諭令改適不聽逼之遂自詣夫